

東
華
續
錄

東華續錄

咸豐八十八

臣王先謙敬編

臣陶澐宣恭校

八月戊戌朔祭大社大稷○命崇恩來京以文煜爲山東巡

撫文謙爲直隸布政使

前貴州布政使

○己亥上御經筵○諭軍機大

臣等本日據奕山等奏遵旨會商分路派員守候夷酋並挑備兵
丁各一摺業經明降諭旨將奕山革去御前大臣令其來京當差
特普欽暫署黑龍江將軍前往辦理矣俄夷人船分赴烏蘇里口
及琿春等處皆稱奉木里斐岳幅之命而木酋至今尚未駛抵北
塘據探復有欲由海路赴上海之說傳聞互異景淳等接奉前旨
已派富尼揚阿在黑河口守候專司查辦並派協領祿昌等馳往
烏蘇里口宣示開導甯古塔琿春等處派令佐領富新等巡察所

均尚妥協黑龍江係該夷必經之路特普欽接奉此旨卽籌前往該處責成派出之署副都統愛仲泰勤加偵探一面會商景瀄妥籌辦理總須明白曉諭使其勿至肆意游行不可含糊了事再蹈奕山覆轍至所稱吉林見在挑備餘丁一千五百名勤加操演但須不動聲色嚴密防範不可稍涉張皇將此由五百里各諭令知之○庚子諭軍機大臣等前據王懿德等奏閩省局存鐵錢十二萬串由調赴天津水師戰船及另雇商船配運赴津等語當經降旨令停止起解以節經費慶端於未接奉此旨之前復據奏稱已先後起運放洋茲據恆福奏此項鐵錢直隸難以流通自係實在情形惟既據慶端等搭運赴津若仍令運回閩省重洋往返轉滋糜費著恆福俟運到時察看情形如果壅滯難行亦可作爲廢鐵暫爲存儲豫備鑄造一切應用防具亦有裨益卽毋庸解回以

免周折將此諭令知之○僧格林沁奏夷船在大沽海口迤南停泊見在防範情形得旨水陸籌防甚爲周密不可稍涉大意以備不虞尤應嚴飭各路統兵鎮將暨弁兵等不准因有前番得意遇夷卽戰徒邀保舉不顧勦撫大局如有前項情事卽由汝處查拏正法不必請旨○辛丑諭內閣有鳳奏撫臣丁憂請簡一招廣西巡撫曹澍鍾見丁母憂著照軍營例賞假百日卽赴四川寓所經理喪事所有廣西巡撫著四川布政使祥奎前往署理曹澍鍾百日後仍著回至廣西署理巡撫俟軍務完竣再補行終制以遂孝思○勝保奏據副將李世忠稟稱來安屢被逆眾攻撲均經擊退七月二十日該副將督令李元忠等帶勇一千二百名於是夜出隊行近賊營拋擲火彈火箭登時火起賊眾亂竄我軍乘勢搶入將賊營燒燬其餘各營之賊望風瓦解我軍勇氣百倍連破賊營

二十八座來安三門賊營二十一日盡行攻拔其西北鄉卓家集所紮賊營同時一律踏毀共斃賊匪千餘名生擒十餘名奪獲糧米一萬餘石逆眾向西南逃竄該副將恐其與滁州之賊合力併攻卽於二十一日帶隊由來回滁並飭都司朱元興由滁城出隊夾擊鏖戰三時我軍與賊互有殺傷旋收隊入城等語查滁州城高糧足可保無虞惟來安城垣較薄恐致被困茲來安之圍旣解滁州之賊不日亦當敗竄回巢臣仍飭該副將嚴密防範不得稍有疏懈上諭逆賊圍攻來安縣城將近兩月經官軍奮擊連獲勝仗七月二十日李世忠督令李元忠等帶勇出隊連破賊營二十八座斃匪千餘名辦理尙爲得手李世忠自投誠授職以來屢著戰功此次復力解城圍實屬奮勇可嘉著發去白玉翎管一枝漢玉搬指一箇大荷包一對小荷包四箇卽著勝保傳旨賞給李

世忠祇領以示獎勵○諭軍機大臣等前因山東曹單軍情喫緊諭令僧格林沁於海防備調官兵內派撥一千名交德楞額統帶前赴韓莊一帶駐紮茲據勝保奏稱見在移營五河相機攻取懷遠因馬隊不敷調遣請將駐紮韓莊之德楞額馬隊一千名就近調往助剿而令僧格林沁再於防兵內抽撥數百名前赴東境各等語皖省軍情目前固屬緊要而山東爲京畿門戶捻匪時圖北竄防兵亦未可空虛著僧格林沁酌量情形如果津防馬隊足敷分撥卽著抽撥五百名派員管帶前赴韓莊一帶歸德楞額調遣並知照德楞額於所管馬隊內撥出五百名派員帶往勝保軍營以資攻剿將此諭令知之○諭勝保奏籌攻懷遠請飭德楞額移師助剿並津防馬隊可否抽撥前赴山東等語懷遠逆氛甚熾勝保擬由濟南節節進剿所帶馬隊分畱東西兩路未能會集自應

急籌添撥見已諭令僧格林沁酌撥五百名派往山東交德楞額統帶卽於德楞額原帶馬隊內撥出五百名派員帶赴勝保軍營助剿此項馬隊官兵展轉調撥未免有需時日見在懷遠逆匪既有約期八月中旬肆擾之說仍著勝保就見有兵勇督率將弁實力進剿不得以守候添兵稍稽攻擊致逆匪愈形延蔓將此由六百里諭令知之○諭周天受奏逆匪竄踞郭村派兵往援並宣南近日軍情一摺逆匪由石埭縣之七都竄入太平縣屬之郭村攻陷官軍營壘徽甯並形喫緊經周天受派副將榮陞等帶兵勇一千七百名馳往應援見駐紮甘棠地方力遏兇鋒此項官兵卽著歸張芾妥爲調度會合江長貴米興朝各軍三面兜剿迅掃逆氛其另股逆匪先後由楊田埂竄撲涇縣所屬之萬級嶺西鄉嶺雖經周天受派員剿擊疊獲勝仗惟賊情兇狡或勾結建德郭村股

匪再圖滋擾亦不可不嚴加防備著周天受妥商勦辦毋令紛竄
將此由五百里諭令知之○甲辰 上幸圓明園○諭內閣向例
會試及順天鄉試正副考官同考官以及內外簾職事等員一經
派出卽應迅速入闈乃昨日朕特派御前大臣景壽等前往貢院
稽查方悉本年順天鄉試考官及職事各員有遲至申刻及酉刻
始行入闈者殊非慎重關防之道姑念相習成風免其置議嗣後
鄉會試年分午門聽宣之日著卽責成稽查御史於聽宣事畢後
卽赴貢院門前將正副考官同考官及派出場內職事各員入闈
時刻一併詳細查明於次日覆奏儻該考官等有是日並無別項
差使無故遲延者卽著指名參奏以肅功令○諭軍機大臣等前
因蔣壩爲清淮門戶諭令袁甲三就近籌辦擇要駐紮並令庚長
妥籌後路防堵本日據袁甲三等奏稱蔣壩情形與上年迥不相

同探聞該逆等聚眾數萬欲水陸下竄直闖清淮陸路地面遼闊無險可扼水路湖面周圍數百里處處皆可登岸不必由蔣壩而來已鈔蔣壩之後實有防不勝防之勢請飭勝保於盱眙以上扼其下竄並於張家溝添撥重兵以杜竄越且擬將安勇原帶之兵進紮馬家壩等語所籌尙屬周妥勝保前經奏明移營五河此時業已行抵該處張家溝爲水陸要衝參將滕家勝兵力較單恐難抵禦著勝保就近添撥扼要駐紮力堵上游至安勇一軍前已有旨歸袁甲三調遣著卽令其進紮馬家壩地方以期聲勢聯絡兼防汴澗小路如天長有機可乘卽可會合進攻總期水陸嚴防節節進逼毋任匪黨得以乘機竄擾是爲至要將此由五百里各諭令知之○乙巳命前任粵海關監督恆祺暫畱廣東辦理通商事宜○丙午勝保奏查粵逆陳玉城前挾副將李世忠歸順獻城之

恨糾合大股賊眾將滁來兩城圍困經臣疊次諭令該副將嚴加防守茲據稟稱自七月二十日出隊獲勝來安解圍後卽於二十一日回滁令都司朱元興陳廣俊等帶勇二千名於是夜三更直襲賊營該逆分千餘人潛出欲鈔官軍之後陳廣俊等回軍轉戰賊復大股由營前衝出朱元興奮力截殺一齊擁入營內外之賊同時奔潰賊營四座全行踏毀追至沙河集將該處賊營圍攻二十一日知縣李元忠都司蔣立功由來安赴沙河集賊營之後攻擊守備倪文藻江如霖由滁州出隊亦於辰刻趕到適臣所派營總郭興阿等帶領馬隊由張八嶺馳抵該處遂會合各隊四路環攻朱元興陳廣俊蔣立功首先撲入弁勇繼進該匪無路可逃被我軍殲斃五百餘名生擒六百餘名郭興阿等馬隊進攻沙河以南賊營踏毀二座殺賊甚多李世忠復派勇五千人由滁州至沙

河輪流環攻將賊營四十七座全行攻破李世忠督隊追剿至龍亭口地方復踏毀賊營六座二十三日追至關山迤西之朱龍橋賊向西南奔竄查滁來二城受困重圍深恐力有難支乃該副將憑城堅守時近五旬會同馬隊官軍大挫兇鋒二城立即解圍實屬勇敢有爲應請旨將卽補副將山東河標參將李世忠以總兵升用其守城在事出力文武員弁懇恩俯准由臣覈實請獎以勵戎行 上諭內閣南路擊賊大獲勝仗滁來二城解圍卽補副將山東河標參將李世忠前次來安解圍曾經降旨嘉獎並賞給翎管等件此次復連獲大勝力解滁州城圍實屬勇敢有爲李世忠著以總兵升用以示鼓勵其守城在事出力文武員弁著勝保查明酌保○諭軍機大臣等勝保奏統籌淮南北剿匪機宜並請飭令幫辦諸臣和衷共濟各等語皖捻以張翼爲首惡見在踞守懷

遠分黨四出惟急籌持穴擒渠則餘匪自易翦滅據勝保奏稱傳振邦素稱勇敢近於緩急機宜未能妥愜徒以孫瞳等匪牽掣兵力無補大局翁同書既以穎壽自任自當力遏兇鋒觀其布置情形恐無實際見擬與傅振邦等併力進攻懷城並派張得勝李世忠等規取定遠其翁同書一軍卽令以堵爲勦所籌均尙周密所有懷遠東路卽著勝保親率水陸各軍由臨淮蚌埠進攻其西南西北兩路並准其調遊擊黃開榜等水師及道員苗沛霖等練勇分股攻擊至北路固不可無兵兜勦而傅振邦有督勦三省擒匪之責駐軍徐宿扼賊北竄未容遠離前經該提督奏明已派令參將滕家勝知縣林作霖等帶兵隨同進取卽著該大臣酌量派撥合力進攻傅振邦著毋庸親往至德楞額一軍駐紮韓莊地屬山東直隸門戶防堵賊匪北犯尤關緊要勝保所稱擬調往會勦之

處亦毋庸議其所請馬隊已據僧格林沁於津防各軍內派撥綏遠城馬隊五百名前往自可迎提應用翁同書退守壽州以後各省餉銀漸皆解到已無飢潰之虞且勝保所撥馬隊並未調回兵力不爲不厚惟當激勵將士力贖前愆著嚴扼壽春兼防霍六不得再行退撤致匪氛蔓延及西路儻能相機前進與總兵張得勝等軍會合攻取定遠不必專候勝保移師尤爲妥善勝保督辦安徽軍務固宜虛中商榷不可稍涉驕矜翁同書傳振邦均係幫辦亦當勦力同心和衷共濟不准各存意見致負委任儻遇事掣肘各不相下以致再有僨事卽著勝保參辦以專責成將此由六百里各諭令知之○諭勝保奏請飭河南山東截留漕糧濟餉等語准北賊勢鴟張必須士飽馬騰方足以資攻勦著瑛榮崇恩於各該省本年應徵漕糧項下截留麥米各五萬石隨徵隨解務於九月

內由水路運赴勝保軍營接濟苗沛霖軍食毋稍延誤仍著該撫等另籌米麥如數補足本年應徵漕糧之數以符正額將此由五百里各諭令知之○諭官文等奏遵撥曾國藩軍營協餉銀兩等語據稱除先後撥解外自本年五月起至八月止共解三箇月餉銀九萬兩以後能否按月如數加解再行籌酌辦理見在曾國藩移營前往宜昌堵截賊匪入川之路每月餉需爲數尙復不少該督等須悉心籌撥妥爲協濟仍著按月如數撥解曾國藩軍營以濟要需不得稍有諉卸致滋貽誤將此由五百里諭令知之○丁未諭內閣前因王慶雲奏江西商民在川捐輸請添設商學一摺當諭令禮部妥議具奏茲據禮部等部奏稱該督所請添設江西商學暨在川省一體鄉試之處與例未符且恐易滋弊竇實屬窒礙難行著毋庸議惟該商人等踴躍輸將自應酌給獎敘著該督

查明該紳商等原籍分隸何處按照所捐銀數加廣江西各廳州縣文武永遠定額及一次學額或總計銀數加廣江西鄉試一次中額如有所捐銀數不敷加廣學額者准其歸入該商原籍續捐銀兩併計覈算卽由該督妥議具奏再降諭旨○江西巡撫耆齡奏遵調總兵普承堯等會攻建德並分派水陸各軍嚴防皖楚賊匪回竄得旨竄楚逆匪復回衝突恐致蔓延爲患無大員督率難期得力○戊申諭內閣翁同書奏安徽省鄉試請仍展至來年辦理等語前因張芾奏安徽眾紳籲請仍借浙闈舉行鄉試當經降旨著於十月內同江蘇一併借用浙江文闈辦理茲據翁同書奏稱皖北賊氛未靖僅有徽甯廣德三屬士子就試各屬未得音信慶典請展至來年秋間特開一科安徽士子志切觀光朕已加恩允准借闈舉行若因皖北士子未能赴考復行停止非朕嘉惠士

林之至意惟人數既屬無多且係兩科並舉照額取中則未得與
考者不免向隅此次該省中額著暫行酌減其所減之額仍歸併
下科補行取中以昭平允應如何酌減之處著禮部速議具奏○
以捐輸軍餉永廣直隸定州學額三名天津縣一名○已酉諭內
閣袁甲三奏地方城池急宜講求修守一摺地方官失守罪名定
例綦嚴前經降旨申諭不准藉詞開脫乃各省督撫及各路統兵
大臣往往於賊陷城池之後率將失事各員藉端奏請留營效力
以爲隨同克復開脫罪名地步甚有失守時不奏至克復後始行
具奏者殊非所以嚴法紀而肅官常嗣後著各路統兵大臣及該
督撫等殫除積習於失守地方文武員弁隨時奏明按律治罪不
准飾詞開脫藉口留營至城垣所以衛民果能修繕完固自足以
資捍衛並著各省督撫飭屬勸諭紳民修築所有軍務省分捐貲

者照捐輸議敘出力者照軍功請獎其並無軍務省分仍照尋常城工例獎敘以示區別將此通諭知之○諭袁甲三奏漕標官兵月餉請動用庫存銀兩等語漕標額設官兵三千四百餘名如果勤加操練已足自成一隊惟近來月餉支絀軍械亦須添補著准其將淮安府庫所存江甯藩司雜款制錢一萬三千六百餘千文銀一萬六百餘兩畱爲操練防堵之費著該署漕督隨時認真操演俾成勁旅毋得有名無實至所撥款項並著責成經手各員覈實動用照例造冊報銷毋令虛糜○以捐輸軍餉永廣山西榆次祁縣學額各七名太谷介休絳各四名太平三名陽曲徐溝平遙河津稷山各二名曲沃翼城孝義鳳台虞鄉忻州聞喜各一名○庚戌官文奏臣前因粵逆竄楚寶郡被圍日久派令李續宜與劉長佑合力進攻連戰皆捷城圍頓解敗賊悉數南遁刻下南省軍

事較鬆川省亦已設防可期有備無患臣前次密陳曾國藩赴川

防剿係在南省軍情喫緊之時亟籌堵禦見在曾國藩一軍若仍

前往是以有用之兵置之無用之地軍情變幻靡常自宜隨時度

勢相機而行邇值皖北賊勢猖獗伺壽州並句結捻逆意圖滋

蔓楚軍自李續賓三河失利都興阿折回力扼兇鋒賊遂東犯六

台江浦等處張國樑勝保分師拒之而復北竄定遠翁同書兵單

餉匱勢不能支臣朝夕籌思皖省見在情形亟須厚集兵力分路

剿辦曾國藩一軍除撥援南省外見畱所部僅數千名臣擬請緩

赴川省暫令駐紮江西湖口候湖南大定調回援湘勇丁一萬數

千人由臣撥給黑龍江新到馬隊數百作爲一軍又臣咨行南省

撤回李續宜並先後派援之馬步水師萬餘人再俟新到黑龍江

馬隊添撥數百名作爲一軍又見駐太湖之多隆阿鮑超馬步隊

共一萬數千名爲一軍再以唐訓方駐宿之師輔楊載福水師而行撫臣胡林翼見駐黃州約所部勇丁五千人合之石清吉余際昌等各營共計萬人爲一軍副都統舒保馬隊輔之由胡林翼親督爲各路後援以上六軍分爲四路步步爲營兼護餉道臨期互相策應相機前進並先期飛咨張國樑派軍由浦口天長勝保由滁淮一帶節節進逼仍由翁同書傳振邦守住北路截開捻逆扼其北竄庶髮捻無由聯絡我軍合力圍剿自可一鼓成功 上諭軍機大臣等官文奏皖省賊勢日張籌議由楚分路剿辦一摺皖省粵匪與捻匪勾結蔓延日甚勝保圖攻懷遠翁同書退守壽州廬州以外並無一旅之師前此楚軍東下復以深入失利以致匪勢漫無牽制肆意竄擾官文以寶慶解圍敗賊悉數南竄川省已有備無患請飭曾國藩緩赴川省暫駐湖口俟湖南大定分軍四

路步步爲營進剿皖省所籌實於大局有益曾國藩前奏尙在湖
口清楚報銷並休息病卒此時如已啟程赴鄂著與官文商酌如
湖南大局已定川境可保無虞卽暫駐湖口俟調回湖南各軍爲
分路進剿皖省之計設湖南敗匪尙未免有入蜀之虞止可從緩
酌量辦理軍情變幻靡常該大臣近在鄰省偵探較確必能相機
籌畫力顧全局至皖省糜爛已極勝保自護城挫敗後其勢不可
復振非由楚省派兵馳援不能牽制賊勢該大臣等務須亟籌協
剿豫爲布置一俟湖南定局卽照所議調撥水陸各軍分路進剿
實深協望官文另片奏請飭都興阿赴任等語都興阿著准其赴
荊州將軍之任俟大兵東下再行帶兵會剿都興阿所部兵勇卽
交多隆阿統帶多隆阿係記名副都統遇缺題奏之員俟有缺出
卽行簡放所請飭催四川等省餉銀已諭令各該督撫迅解矣將

此由五百里各諭令知之○諭騰保奏遵旨查覆馬隊數目及分撥餉需情形並片陳軍餉掣肘各等語皖省東西兩路俱形喫緊翁同書所畱馬隊騰保已奏明毋庸調回其津防所撥綏遠城馬隊五百名諒卽日可到勝保軍營足資調遣該大臣與翁同書分餉一節業經諭知勻撥分濟不至偏枯江蘇奉部指撥解皖之款雖經和春等奏請暫停嗣經部議仍諭令將協濟安徽等餉籌畫兼顧勝保前請飭令浙江四川迅籌撥解亦已諭令有鳳胡興仁各籌撥銀五六萬兩該大臣等不得以爭餉掣肘等詞各存意見至定遠前曾安設總糧臺近因定遠有失與翁同書分軍爲二應將總糧臺移於何處著該大臣等審度地勢酌辦其隨營糧臺此時分作兩軍自應分設以後若歸一處卽可仍照舊章至總辦糧臺之臬司恩錫遠在壽州所有糧臺事務卽著藩司張光第總理

免致貽誤將此由六百里各諭令知之○諭前因曾國藩辦理閩浙軍務當諭令湖北湖南按月各撥銀三萬兩江西川陝等省一律協濟茲據官文奏湖北省年餘以來如數解往湖南自今春粵逆入境旋經停止此外川陝等省撥解寥寥請飭按月如數迅解等語見在曾國藩留軍勦辦皖匪需餉孔殷自應仍由四川等省分撥協濟著有鳳耆齡英桂曾望顏仍遵前旨按月各撥銀三萬兩務須如數籌解毋得稍有遲延致誤要需將此由五百里各諭令知之○勝保奏淮北居民遭賊迫脅宜於整集團練之中寓堅壁清野之義請派安徽藩司張光第督辦宿靈等縣築圩集團事宜得旨卽著責成該藩司督率辦理○于安徽陣亡知州張琪等祭葬世職○癸丑諭內閣和春等奏水陸官軍獲勝情形一摺天長逆匪分股援應六合七月二十三、四等日張玉良派令遊擊李

有才等槍礮迎擊賊勢披靡維時西北兩門之賊均經官軍擊敗
斬馘無數餘皆棄械狂奔官軍追至城根共計斃賊四五百名其
魯港鴉山之賊經水師總兵吳全美於七月初五初八等日派令
鎮將分帶船勇奮力攻勦當將賊壘全數剗平總兵李德麟迎勦
大通等處匪黨焚燒荻港賊巢勦辦尙屬得手仍著和春等知照
李若珠張玉良等分投攻擊速拔城池毋任該逆久踞○甲寅景
濱特普欽奏俄國人船欲赴三姓貿易於行抵窩坑口等處經委
員攔阻折回其闖入烏蘇里人船則恣意行走未肯折回並搭蓋
窩棚爲久居之計兼於綏芬地方開修道路爲明春占居地步奏
入 上諭景濱等體察輿情妥籌辦法○乙卯禮部議奏安徽赴
浙鄉試見止徽甯廣德三屬請將該省兩科歸併中額九十名內
酌中三十六名其所加定額廣額各二名亦先各中一名餘歸下

居補行取中從之○丙辰諭軍機大臣等勝保奏沿淮西剿疊獲勝仗並請飭傳振邦帶兵前進及分撥馬隊各摺片勝保收撫沿淮眾圩圖攻懷遠我軍於三鋪地方扼要紮營斷賊糧道該匪出撲經水陸官軍連日勦擊獲勝而大股捻逆糾合孫葵心匪眾直奔三鋪官軍營盤勢甚猖獗該大臣分布四路兵力較單自係實在情形傳振邦前奏粵捻各逆有直撲徐宿之謠北路更形喫重是以曾諭令毋庸親往惟見在勝保進攻懷遠已有可乘之機三鋪營盤正當喫緊五河張家溝一帶俱形震動傳振邦自應趕緊抽撥馬隊並親帶大兵馳往會合勦辦以期迅速殲除但捻匪股數眾多徐宿一帶地方緊要傳振邦一軍與關保富新黃夏楷等爲犄角之勢以固北路藩籬設勝保將傳振邦調赴懷遠而該匪由西路乘機北竄亦不可不嚴爲之防勝保督辦皖省軍務粵捻

各匪均歸剿辦務當統籌全局毋得顧此失彼儻傳振邦進兵北路稍有疏虞惟勝保是問所調馬隊已諭德楞額撥五百名前赴勝保軍營山東爲畿輔門戶此項馬隊未可久調在外致東境空虛俟攻克懷遠後卽可與翁同書合軍南剿馬隊足敷應用此項新調馬隊仍令折回韓莊駐紮以資防剿將此由六百里各諭令知之○諭據勝保奏皖北粵捻紛乘新調馬隊到營尙稽時日仍請將原紮韓莊之馬隊抽換五百名就近赴皖等語該大臣以皖北軍情緊急期得有用官兵早資攻剿尙係實在情形著德楞額卽將原紮韓莊馬隊抽撥五百名迅速派委妥員管帶前赴勝保軍營所有天津新撥綏遠城馬隊五百名卽酌一面迎提畱於韓莊補足原額以期得力此項馬隊俟攻克懷遠後仍調回韓莊駐紮已諭知勝保矣將此由六百里諭令知之○戊午諭內閣前因

札拉芬奏邊疆告病人員請照各省司道等官嚴定捏飾瞻徇各處分一摺當交惠親王等並軍機大臣會同該部妥議具奏本日該王大臣等議奏請嚴定章程以重職守新疆地方幅員遼闊該大臣等職膺專閫宜如何講求邊防無負委任乃近來紛紛告病殊屬不成事體著卽照該王大臣等所議嗣後各城大臣遇有告病不准自行陳奏其南路附近葉爾羌者責成葉爾羌參贊大臣北路附近塔爾巴哈台者責成塔爾巴哈台參贊大臣附近烏魯木齊者責成烏魯木齊都統附近伊犁者責成伊犁將軍派員查驗給以假期若實係病難速痊令驗看官出具印結由各該將軍等代奏開缺如查有虛捏情弊將本員及出結之員俱議革職代奏之大臣照文職代題之督撫例降一級畱任儻該大臣瞻徇情面亦照文職瞻徇之督撫例降三級調用至伊犁葉爾羌塔爾

巴哈台參贊大臣著由伊犁將軍烏里雅蘇台參贊大臣科布多參贊幫辦大臣著由烏里雅蘇台將軍遵照新章一律辦理其前此告病之固慶奎棟海樸烏勒欣泰保恆各員難保無虛捏規避等情並著該將軍等嚴密訪查據實參奏自此次嚴定處分之後儻再有捏飾瞻徇等弊定必嚴懲不貸至該將軍都統等遇有告病准其自行陳奏惟各有鎮守地方統率羣僚之責尤當正身率屬恪共厥職亦不得藉詞患病率請開缺儻敢意存避就經朕察出亦必加以懲處藉儆效尤其各懷之○諭軍機大臣等崇恩奏匪徒更名充勇沿途滋事擒斬殆盡請飭皖營嚴密查辦一摺據稱本年七月初旬有五品軍功畢汝霖經勝保派令帶同蘭山縣人洪潮赴山東招募壯勇一千名沂屬滋事匪徒因兵役接拏緊急俱更名投往充勇先募得于落等三百餘名由水路前進詎行

至嶧縣韓莊洪潮卽率眾沿途搶掠折回蘭山所轄之橫山地方
又復恣意訛搶拒捕傷人經蘭山縣知縣與護曹州鎮郝上庠督
兵追襲先後斬擒二百餘名惟首犯洪潮等尙未弋獲請飭大營
查拏懲辦等語軍營募勇原以濟兵力之不足似此更名冒勇沿
途滋事致衛民者轉以害民尙復成何事體雖斬擒過半逸匪已
屬無多而洪潮卽幅匪洪澱一爲積年著名兇渠于落亦係匪首
與各夥犯俱未弋獲難保不糾眾仍往南省充勇爲患曷可勝言
著勝保嚴密查拏如有此等匪徒前往大營充勇或冒勇沿途擾
害立卽按名拏獲卽行正法並飭帶兵各員一體訪拏究辦毋令
漏網至存營勇丁固不能紛紛查辦致生反側亦當隨時約束隄
防毋使出而據掠將此由五百里諭令知之○諭瑛棨關保奏堵
剿亳州竄匪獲勝相機迎剿一摺此次擒匪分路出竄窺伺亳州

經關保督兵堵剿攻破賊圩燒毀賊莊兇鋒已挫永城之賊亦由黃良楷迭次截回乃逆捻劉狗等聚集藍黑旗賊眾由間道北趨分股欲走鹿邑其永城邊境及百善站等處均有匪蹤並聲言赴東省築圩盤踞捻匪意圖北竄亟應設法截剿關保見已折回鹿邑著卽確探北路賊情分投迎剿斷不可令其肆意蔓延況孫葵心等由宿西永東分路北趨賊勢猖獗尤應與傅振邦黃良楷等兵勇會合剿擊關保卽飭所派參將承惠等馳往協剿以遏北竄並嚴扼鹿邑偵賊所向迎頭堵截毋稍延誤本日據崇恩奏勝保派員赴山東招募壯勇匪徒洪潮于落等更名充募行至韓莊沿途搶掠經兵勇圍捕膽敢放槍拒敵見已斬擒二百餘名逸犯無多惟首犯未獲等語匪徒冒名充勇爲害甚鉅除已諭勝保查拏外豫省軍營如有壯勇投效務當查明籍貫來歷毋令此等匪徒

冒名涸迹其見在之勇投營已久不便再行查辦致令猜疑亦應
嚴加約束不可稍涉大意將此由六百里諭令知之○諭給事中
方濬頤奏甯國軍需緊要請仿照成案撥鹽濟餉等語安徽甯國
府逼近江甯毗連浙江杭州湖州兩府係江浙兩省門戶見在甯
防緊要需餉孔殷自應寬爲籌備以資接濟該給事中所稱援照
周天爵曾國藩辦過成案擬酌派鹽十萬引由官督商運往江西
銷售一切應完淮浙課稅正雜等款悉照曾國藩定數徵收辦理
有無窒礙之處著胡興仁體察情形迅速妥議具奏原摺著鈔給
閱看將此諭令知之○己未諭軍機大臣等何桂清奏米曾請照
新章完納船鈔卽在潮州臺灣先行開市一摺米酋華若翰回至
上海將在京照會飾詞狡賴並約該督前往上海會商先照新章
完納船鈔並在潮州臺灣二口先行互市等語各口通商須俟英

佛條約議定後再開新章桂良等照會該酋聲敘明晰今華若翰
欲在潮州臺灣先行互市何桂清見已備文照覆俟其覆到如必
欲與該督一見自可往崑山一帶與該酋會晤所請完納船鈔一
節似尚可允至潮州臺灣本在五口之外必須俟英佛兩國定局
後方能辦理斷不准其先行互市將此由六百里諭令知之○諭
本日據何桂清等奏仿照招商販運成案由商墊辦採買米石先
由海運沙船起運四五十萬石以十萬石爲一批從中秋後起至
十一月陸續放洋等語此次運津米石係該商等先行墊貲辦理
亟欲運豆回南著派陳孚恩前往天津認真查驗隨到隨收並嚴
禁需索勒抑等弊俾該船商迅速反棹不至在北守凍所有隨同
驗米之倉場坐糧廳著該尙書酌量帶往妥爲辦理將此諭令知
之○庚申諭軍機大臣等羅惇衍等奏各屬捐輸銀兩撥歸官局

此後團練經費擬民捐民辦等語廣東各屬捐輸前據羅惇衍等奏請撥歸官局作爲西北兩江軍餉茲復據該侍郎等奏稱前後各屬捐輸銀四十餘萬兩撥歸官局催收陸續止收得銀十萬餘兩見仍選派紳士將已捐者剋期催繳未捐者認真敦勸等情此項捐輸銀兩旣已撥歸官局應由勞崇光督飭辦理其已收之十餘萬兩作何開支有無浮冒未收之二十餘萬兩亦當設法催繳收齊後如何支用卽著勞崇光查明具奏至團練經費旣據羅惇衍等請歸民捐民辦及設立巡船收取絲費將來應否仍行請獎並未聲明著勞崇光知照該侍郎等分晰覆奏妥爲經理勿拂輿情將此由五百里諭令知之○幫辦軍務雲南提督傅振邦奏截擊北竄各匪獲勝並親赴固鎮扼要堵剿得旨此時剿賊機宜總以嚴扼北犯爲要旣有穎阜之賊赴淮之信尤防其劫我空營著

速調苗沛霖緊躡其後以成夾擊之勢可期得手○辛酉諭內閣吏部等衙門奏遵議各員處分一摺降調湖南布政使潘鐸失察伊子敦儼科場遞送關節條子著照部議降一級調用其審結遲延之怡親王載垣鄭親王端華兵部尚書全慶陳孚恩俱著照議罰俸一年以上各員降調罰俸處分均准其抵銷○諭軍機大臣等曹澍鍾奏請飭催川省欠解餉銀等語四川應解廣西餉銀除撥解外尙欠解銀十四萬五千兩見在廣西大股逆匪竄撲桂林勢甚危急非重兵無以埽除餉需刻不容緩著有鳳卽將欠解該省銀十四萬五千兩迅速解赴廣西毋得稍有遲延致誤要需其楚省紳商在川捐輸銀兩前據王慶雲奏勻撥廣西應用此項續收有款亦卽酌撥解往將此由五百里諭令知之○駱秉章奏逆首石達開因六月二十八九等日兩次被剿悍賊死傷過多思與

官軍決一死戰七月十五日該逆親率死黨二萬六七千人分爲數十股力攻賀家坳大營李續宜飭各營靜以待之已刻營總德海率吉林黑龍江馬隊王聯芳張正元率親兵營馬隊胡裕發沈俊德李續遠彭星占彭炳武梁作輯于高勝劉長槐郭鵬程羅重世各率所部開壁齊出李續宜率金國琛毛有銘李光燦中右兩營急起衝殺賊勢不支紛紛鼠竄陣斬長髮悍賊二百六七十名生擒八十四名內有僞渠帥胡德哮僞統戎陳麗江及各僞目二十八名其撲犯龍安橋渡頭橋官軍營壘者均經各營勦敗斃賊甚多十六日夜賊分兩路竄走趙煥聯焚東路賊壘斃賊七八百名鄒漢章督所部截擊西路竄賊陣斬二百餘名其由南路走新甯東安旁出武岡者劉長佑田興恕江忠義率營追之田興恕是夜追至九羣橋白楊鋪一帶斃賊約四千餘名陣斬僞左旗中制

黃立英偽檢點陳明友等十餘名生擒五百三十餘名內有偽將軍蔡洗還周子幅王智明偽提審孫子汝等救出難民七百五十餘人江忠義是夜亦追至九鞏橋白楊鋪斃賊四五百名生擒偽將軍李碇發偽通傳許以詳等四十五名劉長佑大隊繼至沿途擒斬無算十八日追至大臨橋殺賊三千餘名生擒二百餘名十七日李續宜躡蹤緊追沿途斃賊五六百名解散七八千人十八日李續宜至水田鋪追及石逆大隊適賊之分竄祁陽界者來此會合石逆與之合陣設伏以禦追師李續宜分軍接剿鏖戰三時賊勢紛潰計殺賊五六百名生擒三百餘名拔出難民六七千人是夜賊卽潛竄二十日前隊已抵東安之蘆洪司官軍因居民遷避購米殊難未能速進二十二夜間劉長佑江忠義飭席寶田由楊田覓路徑擣蘆洪斃賊二百餘名賊復驚竄二十六日蕭啟江

各營至白芽市沿途斬獲頗多生擒僞將軍楊家廷先鋒馬繼涓
訊據供稱石逆連夜奔竄已入廣西全州興安地界矣是日前竄
永明之匪復由灌陽竄近道州之小坪地方適臣調赴永州截剿
竄賊之魏喻義帶所部桂勇一千五百名自江華馳至二十八日
行抵小坪賊復向永明逃逸魏喻義追至筒車尾分三路衝殺復
薄諸溪岸斬賊數百溺斃者約千名餘匪仍由永明竄去臣查逆
首石達開自江西南安突竄湖南其意專注鄂蜀當竄擾郴桂之
時晝夜兼行本圖先陷永州以趨寶慶寶慶失則常澧辰沅靖各
府州均將受其蹂躪而犯鄂圖蜀之勢成矣迨猝攻永州經官軍
剿敗立解重圍奸謀頓阻於是嗾賴進攻東安石逆自攻祁陽以
牽掣我師陰令逆首傅忠信喻子和陳亨容等乘間取新甯武岡
以趨寶慶其分黨出沒兩粵與湖南邊界者蓋欲分我兵力以亂

吾謀也東安陷後幸江忠義速至新甯武岡兩保危城劉長佑劉
坤一還救新甯五獲大捷田興恕力扼九鞏橋連戰皆勝而後寶
慶之禍稍紓石逆在祁陽屢挫復糾賴傳喻諸逆仍犯寶慶陳亨
容蕭壽瑣兩逆仍犯新甯以牽劉長佑劉坤一之師幸劉長佑江
忠義繞由寶慶西北渡資而東而劉坤一與江忠濬等亦將新甯
之賊擊退賊眾悉萃寶郡勢雖危險而該逆偏聚一方亦成孤注
矣六月二十五六七等日石逆以援軍厚集決計力攻幸寶東諸
軍悉力支持殺賊數千李續宜又從北路直攻其瑕二十九一戰
大挫兇鋒賊勢日蹙窺伺鄂蜀之謀頓息此皆官軍所獲生賊及
賊中僞札所言之情狀也臣前奏賊勢非極窮蹙斷不竄粵今雖
竄入粵西其志亦斷不久踞或由柳州北境融縣懷遠一帶入黔
仍遂其竄蜀本謀或由廣西湖南邊界竄廣東以回竄江西皆未

可定然廣西兵餉兩絀勢恐難支湖南自應速爲追剿臣已飭劉長佑蕭啟江各統所部援粵李續宜本湖北不可多得之將皖事甚急斷不可久畱於湘已飭其將所統湖南各軍布置周妥仍帶所部湘勇五千餘人返鄂田興恕一軍頗能力戰臣慮賊由融懷入黔仍須調此軍由武岡綏甯靖州扼之所以固楚應黔而遏其趨蜀之勢也其餘各軍應分扼道州永州郴州桂陽各屬堵其竄楚竄江兼遏廣東竄楚之賊臣當斟酌情形量爲調遣此次大股逆賊竄入湖南號稱數十萬能戰者實不止十萬之多除永州祁陽新甯寶慶諸大戰及連次斬獲解散外其竄入粵西者尙有數萬人臣不敢以餘匪他竄爲詞上諭駱秉章奏逆賊窮蹙南竄楚境漸次肅清見在籌畫援剿情形一摺江西等省逆匪同時竄擾湘中眾至數十餘萬經駱秉章督派將領痛加剿洗逆賊南竄

楚境漸清辦理尙爲迅速其竄粵之賊見據曹澍鍾馳奏該匪竄至平樂府城經官軍擊敗後復全股進徧省城勢甚危急駱秉章既派劉長佑蕭啟江兩軍往援著卽催令迅速前進與粵省各軍力籌會剿至該撫揣度賊情以今雖竄入粵西未必久踞或由柳州北境融縣懷遠一帶以入黔仍還其竄蜀本謀或由廣西湖南邊界竄廣東以回竄江西所慮皆能確中賊情著卽畱田興恕一軍探明逆賊果有入黔消息卽調由武岡至綏甯靖州一路力圖扼截其李續宜所統湘勇並前調馬隊均著仍回湖北以資防剿餘如道州等處應行嚴防各要隘並著察看賊蹤隨時派撥兵勇前往堵截以阻其紛竄江西廣東等省該撫統籌大局無分畛域總期迅掃賊氛毋令滋蔓其本境零匪仍著嚴飭地方文武悉數殲除無畱餘孽將此由六百里諭令知之○廣西巡撫曹澍鍾奏

湖南永明股匪於六月二十九日竄出恭城縣龍虎關一帶地方
臣以平郡空虛恐爲該匪掩襲商令藩司蔣益澧帶兵前往七月
初四日馳抵平樂該匪萬餘人已由間道趨至二塘屯紮初五日
大股分路撲城蔣益澧率眾登陴擊斃賊匪多名初六日賊復偪
近城根並擡架雲梯拌死爬上蔣益澧督軍施擲槍礮石傷斃
二百數十人賊卽退走蔣益澧隨率兵勇分投出擊並飭水師順
流追勦適知府潘家禎等由恭城回軍都司何萬華等由修荔回
軍合力夾攻該匪大敗跨山踰嶺而逃追殺十餘里共計斃匪一
千餘人生擒長髮老賊一百二十一名初七日追至馬牽山周塘
渡又殺賊六七百名該匪擁擠過渡溺死無數餘眾悉往蓮花墟
逃逸旋據探該匪已全竄灌陽蔣益澧恐其衝出全州興安蔓延
北路當飭訓導胡錚率勇一千五百名繞赴興安賣豬嶺扼要堵

截紫營甫定該匪大股驟至各勇力戰因勢單難支被賊衝散胡
鍾不知下落該逆分踞全州石塘墟麻子渡及興安界首等處上
至靈川並據全州稟報湖南寶慶新甯各賊經官兵擊敗自東安
竄入該州各鄉約計數萬人查該匪爲石達開分股竄擾數省既
悍且眾此次突撲平郡幸蔣益澧先期馳至將該逆擊敗克保郡
城乃該匪復以數萬人竄出興全北路寶慶大股潰匪又窮蹙竄
粵是其意非分擾全州扼楚粵之咽喉卽直窺省垣臣已先飭署
右江道蘇鳳文馳赴全州督率全州灌陽興安各文武紳團相機
防剿惟省門爲根本重地尤須嚴行戒備會垣存兵僅一千餘名
不敷分撥抽調附近團練一二千名來省保護臣與學臣李載熙
力籌防守飛飭蔣益澧先顧所急督軍回省策應並咨湖南撫臣
迅移寶慶得勝之師或另撥勁旅跟蹤來粵追剿應援部署甫定

詎該匪陡於二十九日擁眾萬餘直撲省城臣在北門城樓督戰聞礮轟擊立斃悍賊百數十人其分撲各門之賊又被官紳殲斃多名該匪遂退去十餘里分處屯紮臣督飭在城文武晝夜嚴防適將益澧統帶各軍於八月初二日到省俟布置周妥卽行出剿惟冀一鼓作氣迅掃賊氛仍請飭下湖南撫臣迅速調兵撥餉來粵以期厚集兵力悉數殲除臣並飛咨署兩廣督臣勞崇光一體撥兵來西會剿庶可早日蕝事上諭曹澍鍾奏擊敗湖南永明股匪並大股圍逼省城見籌戰守情形一摺逆匪自湖南敗竄因官軍各路追擊無可藏身直撲廣西省城經曹澍鍾激勵將士力挫兇鋒該匪業已疊受懲創不難迅解城圍本日復據駱秉章奏派令劉長佑蕭啟江帶兵赴廣西會剿該撫卽可飛催該道等並所咨廣東之兵與蔣益澧會合夾擊毋任恣蔓儻該逆經官軍擊

敗後竄往他處仍著蔣益澧等實力進剿一面飛咨鄰省迎頭截擊總期盡殲醜類不至竄往四川江西等省滋擾是爲至要其平樂剿賊文武員弁兵勇著照所請俟該省肅清後准其彙案保奏將此由六百里諭令知之○廣西巡撫曹澍鍾奏遵查藩司蔣益澧數月以來深自惕勵不敢再存玩泄得旨將來省垣解嚴該藩司如果始終出力仍准覈實保奏○壬戌諭內閣上年順天科場一案失察子弟遞送關節條子之尙書陳孚恩等應得處分均經吏部照例議以降一級調用並聲明公罪例准抵銷業已先後照議允准朕思科場定例向多從嚴其失察子弟黃綠犯法與尋常失察處分亦當有所區別一概議以公罪似未允協嗣後官員凡遇子弟有於科場黃綠納賄交通關節失於覺察者俱著降一級調用照私罪例不准抵銷並著將此次諭旨纂入則例永遠遵行

○諭軍機大臣等勝保奏擊退沿淮東竄賊匪並約會傅振邦合兵截剿一摺勝保見在督兵沿淮西進力擣懷遠而懷捻糾合粵逆大股已繞出三鋪以東意欲直趨蘆塘口過河鈔越張溝徑犯五河大營後路雖經水師截擊獲勝而大股尙踞沿淮一帶其勢甚熾勝保派令黃得魁將三鋪攻懷之軍移紮蘆塘以遏東北竄突之路並調回明光馬隊赴淮北令滕家勝嚴扼張溝知府秦榮等進攻臨淮以擣賊後布置均尙周妥惟賊鋒尙未大挫難保不復思竄突傳振邦經勝保咨催赴援所派之兵已馳至固鎮九灣一帶該提督亦已行抵固鎮相距止百餘里著勝保卽與訂期會師將一切攻剿機宜從長商榷何路賊勢喫緊卽由何路扼剿總當通籌全局力挫賊鋒不可使賊由西路乘機北竄方爲妥善至該大臣與翁同書分餉一節疊經諭令均勻分撥接濟不得偏枯

本日據翁同書奏山東餉銀二十萬兩行至徐州爲勝保截畱前撥餉銀四萬二千兩止收一萬七千兩其續解二萬兩復經勝保提回請飭將山東協餉照舊撥解壽州軍營等語勝保與翁同書同辦一事卽宜同顧大局固不可存畛域之心尤不可有計較之見務當仍遵前旨酌量勻撥翁同書軍營俾資接濟而振飢軍將此由六百里各諭令知之○諭翁同書奏勝保於奏明撥解之款又復追回該撫見已函商勝保勻給並請飭將山東每月協餉銀二萬兩仍令遵旨撥解本日已有旨諭知勝保酌量協撥並令該大臣隨時接濟該撫軍營毋任缺乏至各省應解餉銀雖經屢次批准但仍當彼此均勻分撥互相接濟不得稍存意見有礙大局見在合攻壽州之賊既經擊退該撫仍當督飭弁兵加意防守其六安一帶並著一體嚴防勿任竄逸本日據勝保奏明光情形緊

急張得勝一軍恐不能卽攻定遠懷遠大股賊匪併力東撲勝保
已約會傅振邦合力截擊翁同書卽當督催黃開榜等礮船迅速
前進並飛飭苗沛霖等調齊團練相機夾擊是爲至要淮南賊氛
甚熾該撫身膺重寄責無旁貸務當與勝保等和衷商辦以期迅
殲醜類不得因分撥餉需意存畛域致誤事機自貽咎戾懍之愼
之將此由六百里諭令知之○甲子勝保奏接准河南巡撫臣瑛
棨會奏皖北情形摺稟實屬切中時勢並請添撥馬隊另派重臣
督師南下得旨北路緊要雖有馬隊實難再撥若果遂汝之願萃
集勁旅三千試問僅能復一懷城驅賊南竄抑卽可廓清皖北卽
汝身歷行間亦難確有把握至汝摺中隱約其辭不知該撫等所
請是否准駁並欲擇人與共擇地而居豈能逃朕鑒耶○予陣亡
遊擊廖達章祭葬世職○乙丑諭內閣前因禮部奏上年順天鄉

試科場舞弊案內應議監臨各員失察處分尙未允協交惠親王等大學士軍機大臣會同禮部妥議具奏茲據惠親王等詳查例案悉心覈議開單呈覽此案陳庭桂家人胡升攜帶關節入場該監臨等官未能查出自應分別議處除八月初六日另有差使未到業已知照外場察院之按檢王大臣等及續派執事各員並前充提調另案革職之前任順天府府丞蔣達均著毋庸議處外所有戊午科順天鄉試監臨刑部右侍郎景廉降調順天府府尹梁同新著降二級畱任外簾監試之給事中志文清安顏培瑚御史寶麟那蘇泰謝增朱文江尹耕雲內監試之御史奎斌給事中見任順天府府丞毛昶熙均著降三級畱任奎斌及調充內簾監試之御史尹耕雲復失察主考家人向房官查卷並臨時抽換中卷著照例再降二級調用其貢院門按檢審親王仁壽肅親王華

豐定郡王溥煦內閣學士雙福吏部左侍郎文清兵部尙書陳孚
恩刑部左侍郎齊承彥戶部尙書肅順前署副都統廣科雙祿副
都統文壽恩醇多隆阿繼善乾清門侍衛榮全西拉綱阿慶壽駟
門按檢豫親王義道莊親王奕仁前任大學士翁心存吏部尙書
許乃普左副都御史富廉副都統存佑察杭阿巴雅爾綽克托前
署副都統奎章富泰德鑑休致都統英隆乾清門侍衛克蒙額岳
林貝勒溥莊專司稽察之都察院堂官刑部尙書瑞常外場巡察
御史徵麟忻瀉魏睦庭給事中李培祐均著罰俸一年以上各員
應得處分雖係公罪均不准其抵銷○予江西殉難府照磨錢錫
恩祭葬世職○丙寅諭軍機大臣等本日據袁甲三庚長奏逆匪
撲擾張家溝營盤勢將下竄見在布置情形一摺懷遠逆捻句結
西路股匪沿滄東竄見距五泗交界之九灣一帶撲擾張家溝營

盤勢甚狃狃並有分兩股繞越五河後路至清淮聚齊之說袁甲三等見雖飭各處兵勇節節堵剿而所部並無馬隊恐難制勝德楞額駐紮韓莊礙難遠擊致東境空虛本日已諭令該副都統探明賊蹤如逼近東境卽行迎頭截擊不可遠追以防後路矣勝保見在駐紮五河兵力較厚此時捻匪如繞越五河直犯清淮著責成該大臣實力堵剿勿任東竄儻該大臣旣不能進攻懷遠又不能顧盱眙蔣壩以保清淮咎將誰諉朕惟有執法嚴懲豈能任其粉飾趨避歸過他人至畱防盱眙兵勇袁甲三等旣請仍歸勝保調度著如所請勝保所調安勇馬隊二百名已據該大臣奏稱撥回蔣壩袁甲三不得以所部並無馬隊爲詞所有西路各要隘及高寶湖等處撥兵防守之處均著袁甲三庚長督飭吳棠張金榜等實力嚴防毋令該匪紛竄將此由六百里各諭令知之○諭袁

甲三等奏逆捻勢欲下竄見籌布置防禦情形一摺該署漕督等以懷遠逆捻句結西路股匪沿淠東竄見踞五河泗州交界之九灣一帶聚眾數萬直撲張家溝接據各路探報均有東犯清淮併力下竄之語請飭德楞額帶全部馬隊馳赴宿遷縣屬之洋河等處會剿自爲先事豫防起見惟該副都統所紮韓莊地方係北路要區自當力保東境門戶不可徑行出境越剿致該逆乘虛北竄鈔襲我後爲患更大至駐紮處所距宿遷不遠德楞額總當俟該匪竄近東境方可提兵於山東江南交界之區迎頭攔擊仍須兼顧後路不可出境遠追致令繞越前諭令抽撥馬隊五百名赴勝保軍營當已啟程其由津防調往之綏遠城馬隊五百名不日趕到卽可補足原額以備衝擊該副都統務當妥籌防剿勿稍疏虞將此由六百里諭令知之○賞朱鳳標翰林院侍講學士銜仍在

上書房行走○是月減免江蘇橫浦等六場被災竈地八年額賦十分之一蠲緩河南睢州等二十三州縣被擾村莊新舊額賦

九月丁卯朔諭內閣福濟奏番族投誠地方肅清並安插戶口善後章程開單呈覽一摺甘肅野番連年滋事經該大臣親督員弁出口查勘開誠布公殲厥渠魁寬其脅從隨處覈定界址編查戶口妥爲安插統計八族共一千七百四十七戶男婦大小一萬八千四百二十名口該番感激歡呼交出認賠牲畜及被搶牛馬羊各物呈出承保十事及分守要隘各甘結地方得以肅清辦理尙屬妥速所有善後事宜卽照奏定章程十條妥爲辦理嗣後每年巡查禁通事之句引防歇家之容畱賞罰必明奉行必力均責成該管廳營妥爲經理以期日久相安此次調撥兵勇所需經費俱係在事官紳捐辦著免其造冊報銷除捐貲人員照例請獎外其

出力各員著福濟擇尤酌保數員毋許冒濫○諭軍機大臣等昨因逆匪滑澮東竄恐其直犯清淮責成勝保實力堵剿本日據勝保奏明光已爲賊踞力顧淮北勢難分身東顧並逆眾已撲近盱眙請飭袁甲三力固蔣壩各等語逆匪潛分大股竄至南路撲擾明光盱眙地方逼近清淮該逆由河稍橋前來圍逼官軍營盤勢已岌岌副將格洪額一軍能否支持尙未可知勝保雖因中路五河爲水陸要衝不能撤動仍應嚴飭格洪額張得勝等力保盱眙不可再有疏失德楞額所撥馬隊五百名一經趕到卽相度緩急分撥前赴盱眙一帶協同攻剿勝保不得全數截畱致有貽誤此時清淮防務最關緊要袁甲三所調艇船四十隻旣能得力應否撥赴三河衡陽一帶扼截或抽撥若干駛赴洪湖與勝保所派礮船聯絡聲勢之處著袁甲三庚長就近妥爲布置勝保撤回馬隊

二百名已赴蔣壩該署漕督等卽督飭安勇實力防剿以遏賊衝將此由六百里各諭令知之○勝保奏據總兵李世忠密稟逆首韋志俊復由江南池州帶賊過江四眼狗陳玉城糾眾闌阻彼此忿爭於和州地界兩相殺戮李秀城不知因何被洪逆鎖至南京李秀城手下賊眾亦幫同韋志俊與陳四眼狗所帶之賊仇殺死者數千請臣乘此機會速籌進兵可滅此賊見在臣軍進紮淮北力扼粵捻北竄之路斷無餘力南剿但得江南之軍迅攻金陵以擣其巢一面分兵亟圖浦六令賊首尾不能相顧其楚北東征之師剋日水陸直抵安慶合力圍剿使賊向南回顧臣率淮北一軍轉戰而前或可收三路並進之效上諭本日勝保奏賊踞明光撲近盱眙請飭和春等迅攻浦六等處以分賊勢並據李世忠稟探首逆韋志俊由池州帶賊過江陳四眼狗糾眾攔阻於和州地

界兩相殺戮並聞李秀城被洪逆鎖拏其手下賊眾亦幫同韋逆與陳逆所帶之賊仇殺機會大有可乘見在淮南賊氛猖獗昨據袁甲三等奏已有欲犯清淮併力下竄之語加以盱眙重賊勢日肆蔓延勝保進紮淮北圖扼粵捻北竄之路其力不能他顧本日已諭勝保袁甲三等各籌扼截亦恐能堵而不能剿果能以江北各軍分擣浦六天長攻其所必救則盱眙等處之賊有所牽制不至直犯清淮且該逆內訌已成能迅攻金陵以擣其巢剿辦自易得手著和春張國樑等乘此機會督飭水陸將弁謀取金陵其浦六天長圍攻已久李若珠業已過江著趕緊督催將弁實力攻剿無論何處下手若能速拔城池即可稍分賊勢俾勝保淮北一軍得以節節兜擊方操勝算將此由六百里諭令知之○以防守明光不力革湖北宜昌鎮總兵官張得勝職仍畱營剿賊○戊辰

諭軍機大臣等袁甲三庚長奏盱眙失守見籌堵剿傳振邦奏滄西情形緊急並因舊病舉發懇請賞假調理各等語傳振邦著賞假一箇月在營調理淮河南北捻粵交乘勝保等身任堵剿之責其各盡心力四面兜剿勢將不可收拾盱眙失陷以後袁甲三等派撥遊擊張金榜道員吳棠會同安勇等嚴防蔣壩其洪湖西北一帶業經調撥兵練分投防堵布置雖尙周密惟兵力較單所有淮河下游仍責成勝保派撥兵勇嚴行扼守既防該逆鈔襲後路並可相機克復盱眙袁甲三庚長仍當悉心經理不得以布置已周稍涉懈弛德楞額扼紮韓莊以固東省門戶昨已諭令不得徑行出境該署督等所稱函商該副都統進紮清江之處著毋庸議其高澗礮位旣因道梗未能運送勝保營中卽著仍畱該處以資防守至捻匪東西紛竄飄忽無定無非欲乘隙北犯前據勝保奏

稱懷遠爲擒匪老巢惟速拔該城則匪勢自蹙所籌不爲無見此時賊勢日熾勝保惟當就見有兵勇速攻懷遠務拔堅城其紛竄各匪應如何擇要堵禦勿令肆行滋擾之處並著隨時相機籌辦傳振邦雖經請假宿永一路係該提督專責儻該匪果行北竄仍著妥爲調度令派出之總兵博崇武等分督馬步兵勇迎頭截擊其總兵富新道員黃良楷兩軍並准該提督調遣此項兵勇雖多未經戰陣亦當時令出隊俾資練習以期悉成勁旅扼賊北竄總之皖事日棘急應合力兜圍以免蔓延他省該大臣等惟當和衷協力共濟時艱儻敢意存取巧互相諉卸以致貽誤事機恐不能當此重咎也將此由六百里各諭令知之○以廣東勦賊出力復已革按察使張敬修職並花翎○予廣東陣亡知府文晟祭葬世職建祠知縣劉蔭棠等祭葬世職○己巳諭內閣黃宗漢等奏股

匪投誠懇免治罪一摺廣東陽山縣屬之果子寨等處自咸豐四
五年股匪四起雖經官紳擊散尙多潛伏經黃宗漢等宣布恩旨
剴切曉諭並委捐升參將孔繼堯等親往查辦該股首李幹黃相
奎等先後悔罪投誠並請立功自贖適懷集匪徒圍攻陽山縣城
孔繼堯卽親帶黃相奎等七百名馳赴援剿立解城圍李幹等六
百名亦經廣州府知府吳昌壽帶赴韶州進剿樂昌踞匪屢獲勝
仗見將大灣七羣各老巢悉數蕩平尙能輸誠效力所有股首李
幹等三十名並夥黨五千九百七十二名均著免其治罪該頭目
等果能奮勉立功再行據實請獎○諭勝保奏沿淮西剿大獲勝
仗並東路官軍擊退盱眙賊匪一摺捻粵大股賊匪沿淮下竄經
勝保派令副都統穆騰阿等分三路迎擊賊眾敗退遂由東南進
兵將沿途賊卡賊船盡行焚毀三鋪四鋪各賊圩亦悉攻破其東

路另股賊匪於撲入明光後復竄踞盱眙守備余通海等統帶礮船駛至河梢橋將賊擊敗遂抵清水壩整隊進攻賊勢不支悉向東南遁去防盱各軍仍回原營扼守副將格洪額經勝保派防盱眙被匪闖入著摘去頂帶責令認真防剿○齡椿以病免以伊霖爲廣東按察使

由肇羅道遷

○庚午諭內閣鑲白旗滿洲奏統兵大臣

見丁母憂應否回京穿孝一摺欽差大臣鑲黃旗蒙古都統勝保之母在京病故該大臣見在安徽督師正當喫緊之際未可暫離勝保著俟軍務完竣再行回京穿孝○以欽差大臣鑲黃旗蒙古都統勝保母喪賞銀四百兩○辛未以重宴鹿鳴賞致仕左都御史沈岐尙書銜並御書匾額知州銜湖南新甯縣知縣宋翔鳳知府銜○王申諭內閣昨因鑲白旗滿洲奏勝保之母在京病故業經降旨令勝保俟軍務完竣再行回京穿孝並賞銀四百兩交

其家屬經理喪事以示優眷並據勝保奏稱家丁到營述知母病垂危籲懇賞假一月回京省視冀見伊母一面卽行旋營報效情詞懇切具見孝思惟此時伊母業經病故有伊弟廉保料理喪事而勝保督師安徽正當勦辦喫緊之際惟當暫畱軍營古人墨經從戎盡忠卽以盡孝該大臣仍遵前旨俟軍務完竣再行回京穿孝該大臣惟當迅速圖功肅清皖境庶幾忠孝兩全朕實有厚望焉○癸酉諭軍機大臣等據裕瑞奏浩罕遣使遞稟復差額爾沁隨班進京當經詳爲開導等語浩罕伯克差額爾沁阿布都則里木進京朝貢經該參贊大臣詳爲開導本年各城伯克年班均已停止該額爾沁應免進京旋據呈稱懇將浩罕伯克誠心代奏見在暫寓回城候信該浩罕伯克遣使入覲呈進貢物誠悃可嘉旣經開導令將貢物攜回儻該伯克來信應允卽毋庸議如必欲呈

進貢物籲懇代奏自應准其納款所有原進貢物著卽賞收由裕
瑞代遞至京朕仍照例頒賞物件並給與敕書以獎其效順之忱
用示懷柔遠人至意將此諭令知之○諭都察院奏直隸開州廩
生种世恩在該衙門呈訴赴京鄉試攜帶羅文並盤費報捐銀兩
偕廩生馬鏡蓉等由籍起程於七月初三日午間行至山東恩縣
途次遇騎馬賊三人各持刀槍搶去銀兩衣物該生等赴縣稟報
署知縣殷嘉樹並不追究反將該生等考羅文書扣存勒令回家
其賊匪自稱德州馮義訪係該州快頭等語恩縣係近畿通衢竟
有騎馬賊白晝搶奪實屬目無法紀直隸廩生种世恩等失去銀
物該署知縣殷嘉樹既不趕緊嚴緝賊復扣畱羅文致該生不
能應試情節尤屬可惡此等劣員縱盜殃民著文煜嚴參懲辦並
勒限緝拏賊盜以靖地方盜首馮義如係德州快役著卽密拏嚴

辦毋令遠颺將此諭令知之○甲戌命胡興仁來京調羅遵殿爲浙江巡撫以瑞璜爲福建巡撫賞張集馨三品頂帶署福建布政使已革布政使○釋發遣已革總督譚廷襄已革布政使雷以誠罪○

乙亥諭內閣勝保奏擊退竄撲盱眙粵捻大股匪眾並陣斬著名逆首一摺八月二十五日賊撲盱眙經我兵擊退旋復撲至清水壩高家凹地方圍裏營盤張得勝格洪額等分路鏖戰多時斃賊無數該逆蜂擁齊來經水師迎頭轟擊張得勝直前衝殺旋用手槍擊中僞前軍主將吳如哮斬獲首級賊勢披靡向南遁走我軍追殺十餘里此次粵捻糾約大股復竄盱眙經勝保督飭張得勝等會同水師礮船併力截剿全數擊退並陣斬著名逆首殲厥渠魁洵足以寒賊膽而快人心著勝保等乘勝進攻盡殲醜類勿畱餘孽○賞安徽軍營病故已革漕運總督楊殿邦道銜予祭葬卹

蔭如道員例○丁丑諭軍機大臣等本日據袁甲三等奏大股逆匪撲擾三河見籌竭力堵禦一招賊匪於退出盱眙後竄至三河南岸又向衡陽一帶搶船爭渡雖經水陸各軍擊退賊匪仍聚黎城金溝一帶與清淮相距甚近情形危急見派都司穆恆德等並遊擊德興管帶存城及所部各兵分赴衡陽及三河並於三河以南收集張得勝等潰敗兵勇洪湖北面添調團練二千名扼守將沿河南岸船隻悉數調歸北岸布置均尙周妥勝保駐軍五河與該處相距較近設使該逆鈔出後路清淮偶有疏虞該大臣全軍亦必受困著卽嚴督張得勝等將屯撲三河之匪實力剿洗其孫葵心一股聲稱取道睢靈以撲清淮袁甲三等力難兼顧並著勝保就近撥兵迎擊毋令東竄袁甲三卽咨和春等攻剿天長以牽制賊勢著先就見有兵勇分投堵遏會合勝保之兵併力夾擊毋

得稍有疏虞將此由六百里各諭令知之○諭曹澍鍾奏大股逆匪圍偏省城請飭催湖南援軍合力剿辦一摺逆賊石達開經湖南官軍痛剿後改竄廣西沿途裹脅勾結不下十萬餘人圍撲省城雖經內文武紳團嚴密堵禦疊次截剿殲斃甚多惟賊眾兵單不敷分布所調赫勇等軍後因路途阻滯一時未能趕到駱秉章前派蕭啟江劉長佑兩軍赴援見於興安靈川一帶爲賊所阻節節攻堅未能長驅直進桂林情形待援甚急設有不虞使該逆踞爲巢穴剿辦更難措手著駱秉章飛催該二員迅速繞道前進或再添撥重兵接應毋稍遷延並著曹澍鍾一面飛提楚軍一面督率文武員弁極力守禦以待援師毋稍鬆勁劉長佑蕭啟江等軍俟入廣西地界卽著曹澍鍾調遣以一事權將此由六百里各諭令知之○幫辦軍務安徽巡撫翁同書奏穎上所屬南召集一

帶擒匪薙髮投誠沙河以南亦漸悔罪安業得旨俟投誠者無懷

反側頑梗者漸可洗心然後將在事出力員弁紳董擇尤保奏數

員以昭激勸○以清盛爲山東布政使降吳廷棟爲直隸按察使

由山東布政使降補○戊寅諭軍機大臣等本日降旨授勞崇光爲兩廣總

督耆齡調任廣東巡撫卽赴新任毋庸來京粵東自勞崇光入城

任事以後疊據奏報在城夷兵無多民夷亦尙相安無事惟天津

勝仗勞崇光入城時尙未知悉以爲和議已成故有入城之舉見

在英佛二國能否就範尙未可定昨據何桂清奏探聞佛夷前與

鄰國構兵見已議和撤回夷兵三千名在香港口聽候消息雖未

知果否確實不可不防前此柏貴在城一舉一動有人伺察文報

皆須折看辦事不能自主彼時尙有黃宗漢帶兵在外遙爲聲援

若督撫同入省城設有變動何能辦理勞崇光旣已入城耆齡

行抵廣東境內卽派委親信安員先入省城面見勞崇光或卽畱
耆齡在外調度防勦事宜是爲至要並著耆齡會同勞崇光詳細
由驛馳奏以紓廛念將此由五百里諭令知之○王慶雲以病免
以勞崇光爲兩廣總督調耆齡爲廣東巡撫以惲光宸爲江西巡
撫毓科爲江西布政使張敬修爲江西按察使候補按察使○己卯諭
內閣李載熙奏廣西布政使蔣益澧貪鄙任性債事殃民自擊退
平樂賊匪後並不跟蹤追勦轉赴荔波致賊匪乘虛窺省迨省城
被圍該藩司僅以疲病之兵千餘回援本省錢糧及各省協濟餉
需均以養勇爲名諸多浮冒遇有調發則以賤值雇募充數其隨
營之賀縣團勇擊賊得力該藩司忌其立功屏棄不用坐擁厚貲
不發兵餉各等情蔣益澧湖南布衣朕因其帶勇勦賊素稱勇敢
不數年間疊次加恩擢任藩司宜如何感激圖報乃近日志驕氣

盈舉措乖方孤恩昧良實出情理之外本應從重懲辦姑念其前此尚有戰功著先行革去布政使以遵員降補仍畱廣西交曹澍鍾差委其侵吞兵餉及過賊恩巡各情節並著該撫查明參奏毋稍徇隱○諭軍機大臣等昨據曹澍鍾奏賊匪圍偏桂林省城請飭催湖南援軍合剿業經諭令駱秉章迅派蕭啟江等軍前往並諭令曹澍鍾固守以待援師本日復據李載熙奏楚匪竄粵城圍方急賊營自西南城外起蔓延百餘里不絕西南北三面道路梗塞文報不通東路特扒船趕禦而十數里外亦有賊蹤柳州湘勇千餘及另起志同軍燎勇千餘均爲賊隔此外別無可恃之兵情形實屬非常危急桂林一城關繫全省大局設令賊蹤闌入剿辦更難措手蕭啟江劉長佑兩軍據稱已入粵境而尙阻於興安靈川一帶著駱秉章飛催該二員迅速設法繞由間道前進並著添

派重兵竭力赴援不至孤軍深入方操勝算勞崇光統轄兩粵著
派撥重兵星馳援應力解城圍並須設法籌撥餉需源源接濟毋
令缺乏曹澍鍾身任封圻責無旁貸著一面飛提楚軍一面督率
文武員弁竭力守禦以待援軍至蔣益澧所部兵勇著交新任臬
司劉長佑統帶責令迅速剿賊所有疲病各勇卽著劉長佑分別
裁汰以節經費而肅戎行將此由六百里各諭令知之○景瀄特
普欽奏綏芬烏蘇里等處山場向禁居民潛往地方空曠擬令攬
頭招募人夫前往保護聽其自謀生計該處地廣山深伐木打牲
採獲捕魚均可獲利明春並可布種口糧以資接濟似此厚集人
力漸壯聲威不煩兵力而足以禦外侮得旨著再悉心籌畫務使
招集人夫以後仍官爲鈐束勿至散而無紀轉貽後患並如何杜
絕勾結於立法之初嚴定章程確有把握方爲妥善至開採升科

等事著俟招募得有頭緒再行籌辦○以李閑爲廣西布政使劉

長佑爲廣西按察使

候補按察使

○庚辰諭內閣官文奏製造火器請

由廣東派撥兵丁前往製造等語噴筒火箭等物爲行軍所必需
廣東駐防旗兵精於製造著准其由該督行文廣州將軍於駐防
兵丁內擇其精於製造者派撥六七名卽委驍騎校賈穆管帶前
赴湖北以便製辦○官文胡林翼奏皖屬石牌鎮地方與宿望潛
太等縣毗連爲入安慶要隘上年官軍回援宿太後該逆復在該
處修造堅城一座阻我入皖之路與太湖城內之賊互相援應兼
通賊糧火藥等項故進兵圖皖必先奪取石牌方爲勝算當飭總
兵鮑超巖守太湖各營副都統多隆阿馬步兵勇於八月二十六
日馳赴榮瀾嶺駐紮連日察看地勢二十八日馳抵石牌派參將
楊朝林等由東面進攻都司周天祥等由北門進攻參將穆正春

由南門進攻多隆阿自率各營出其不意拆毀木城越濠而進該逆驚覺開礮轟擊我軍正值攻城喫緊忽潛山逆賊蠡擁而來卽派吉林黑龍江馬隊二起馳往截擊安慶之賊亦分股來援又派馬隊二起迎剿均被擊退各營步隊奮勇攻城該逆仍堅持抗拒各勇衝鋒冒鎗前者傷亡後者繼進遂攻毀礮眼而入賊眾大亂我軍乘勝投殺其開城逃竄者亦殲殪殆盡立將石牌僞城攻拔覓在分撥大軍駐紮石牌卽乘機攻取太湖以便分路進剿上諭此次援皖楚軍攻拔石牌僞城斬馘無遺盡殲醜類實足以寒賊膽而快人心著官文等仍飭各軍乘此聲威克復太湖縣城節節進剿以靖逆氛○諭軍機大臣等前據有鳳奏曹澍鍾見丁母憂業經降旨照軍營例賞假百日令赴四川寓所經理喪事廣西巡撫著祥奎前往署理曹澍鍾百日後仍回廣西署理巡撫矣本

日曹樹鍾奏聞訃丁憂請簡放巡撫俾得離任守制等語見在逆
匪攻撲廣西省城軍務正當喫緊祥奎尙具奏啟程道路梗阻恐
難卽赴署任且係生手於見辦軍情未必熟悉曹樹鍾著暫畱廣
西署理巡撫安籌戰守事宜俟祥奎到省並桂林解圍之後軍務
稍鬆再行回川經理喪事以重職守將此由六百里諭令知之○
官文奏賊蹤去蜀尙遠皖事日棘進兵不可再遲遵議曾國藩入
川之軍可以從緩擬俟南省撤回各營分路進攻皖逆得旨俟援
楚兵回速定征皖機宜○辛巳諭軍機大臣等傅振邦奏逆捻糾
眾分竄請東豫兩省調兵扼截並關保等軍迎前進剿一摺捻首
孫葵心等在岳家集糾聚黨與分起至永城以西之鄆陽城會齊
出竄已繞迤西之青里棠林等集至張家大屯唐家寨一帶該處
地界蕭碭之間恐由豐縣魚臺窺伺濟甯其永城西南復另有騎

馬賊千餘勢欲向北而趨經傳振邦飭博崇武黃良楷等由豐碭前進李恆清由徐州北發均令鈔出賊前相機扼擊其富新等所帶各隊亦令視賊所向跟躡追剿以成夾攻之勢該提督並力疾親赴北路策應所籌均尙周妥見在白旗股匪是否西竄抑卽在永城西南雖無確信而豐碭等處賊已蔓延未可令其闌入山東邊界雖有德楞額郝上庠兩軍扼賊來路曹單一帶尙屬空虛著崇恩激勵民團齊心守禦與官軍聲勢聯絡並著郝上庠探賊所向出境迎擊如該匪偏近東境德楞額亦卽迎頭攻剿至關保所部馬步隊合之豫省防兵計數亦有七八千人著瑛棨飭所屬帶兵官扼要嚴防並著關保親督承惠等迎前進紮就近截其西路總期四面兜剿偏賊回巢乘機痛洗毋令紛竄其苗練一軍卽著傳振邦催令進攻各圩牽賊回顧並調度各軍奮力迎擊堵其北

竄勿稍大意將此由六百里名諭令知之○癸未賞譚廷襄五品頂帶幫辦直隸團練○甲申諭內閣慶端等奏勦辦甯洋土匪擒獲股首焚燬賊巢全境肅清一摺福建甯洋土匪胡熊勾結黨與迭出滋擾屢經官兵勦擊猶敢竄踞山寨負隅抗拒經署延建邵道英樸督飭員弁四面環攻將該逆首用礮擊傷旋有賊目陳情將逆首胡熊捆送並帶男婦幼孩八十餘名到營投誠該督等已飭該署道卽將逆首胡熊凌遲處死以彰國法而快人心其投誠之陳情等如訊係真心向化卽行免罪妥爲安插見在上游各股土匪或已就撫或經殲滅全境漸就肅清辦理尙爲妥速所有節次在事出力文武員弁兵勇著准其查明請獎以示鼓勵○諭軍機大臣等勝保奏籌攻懷遠援應東路各事宜並懇恩穿孝各一摺逆匪疊受懲創踣伏懷遠老巢勝保派副都統穆騰阿等水陸

進攻並籌度東西兩路情形飭令都司余通海等帶領礮船駛赴三河等處策應布置尙爲周密至所稱撥新到馬隊二百名及馬勇一百名派赴桃源屯紮亦爲兼顧東路起見惟兵分則勢單難期得力著於所派馬勇外另撥步隊相輔飭赴桃源其馬隊二百名毋庸派往畱爲攻勦懷遠之用至該大臣以痛母成疾籲懇暫准回京穿孝情詞哀切具見至性惟此時皖省賊勢猖獗該大臣總統全軍責任至重傳振邦雖係幫辦軍務業已專顧北路斷難兼統全軍其餘如穆騰阿張得勝等止能分路帶兵聽候調度實無人能暫攝統帥之任使勝保北行而軍情渙散貽誤非輕況李世忠等投誠未久恐非他人所能駕馭勝保著仍遵前旨暫畱軍營墨經從戎速清皖境俟軍務稍緩接替有人再請回京穿孝該大臣惟當以移孝作忠之義勉自策勵勿負厚望將此由六百里

諭令知之○予安徽被戕知縣何桂楫祭葬世職○乙酉諭內閣
勞崇光奏官軍克復廳城一摺據稱賊匪分擾連山廳境署同知
翰鳳翔帶勇馳赴上吉抵禦該匪由天堂嶺闖入廳城該署同知
退守金坑山捐貲募勇隨同副將恒通疊次進攻將廳城克復辦
理尙屬迅速署連山廳同知翰鳳翔雖隨同克復究有失守處分
若竟予免議不足示懲著改爲革職畱任在事出力官紳兵練准
其擇尤保奏○諭勞崇光奏粵東西路兵勇克復開建懷集兩城
一摺廣西懷集縣城於咸豐七年七月間被匪竄陷十一月間與
懷集毗連之廣東開建縣城相繼失守懷集以獅子背爲門戶開
建以良心寨爲屏蔽該匪悉力踞守並分股竄擾廣甯等處本年
六月廣甯縣知縣沙翊清等將獅子背賊巢攻破乘勝進攻古水
中壩草湖等處沿途巢窟悉被平毀遂於七月將懷集縣城克復

開建之良心寨亦經署肇慶府知府劉式恕等購覓內應分道進兵於六月十三日攻拔進偏狼嶺遂抵南豐開建縣城卽於十九日克復該逆負嵎自固兩載有餘官軍疊次接仗卒能克復堅城所有在事出力員弁兵練著勞崇光查明保奏仍著嚴拏首匪陳金缸等務獲並堵剿零匪毋任回竄○諭勞崇光奏賊匪竄陷樂昌縣城經官軍進剿克復一摺本年二月間逆匪由湖南桂陽竄擾廣東樂昌縣境署樂昌縣知縣許延穀等督率練勇分投抵禦因賊眾兵單賊匪乘勢闌入經廣州府知府吳昌壽前往應援署總兵勒福帶兵會剿連獲勝仗賊勢已蹙二十三日復派兵勇直撲賊營將更竄望樓縱火焚燒槍箭齊施該匪大敗各勇乘勢攻入當將縣城克復辦理尙爲安速所有在事員弁兵勇准其擇尤請獎以示鼓勵署樂昌縣知縣候補同知許延穀樂昌縣典史婁

禹甸署樂昌城守汛千總南韶連鎮標左營把總蔡有芳雖經隨同大軍克復縣城惟失守城池咎有應得功過不足相抵著一併革職仍責令隨營效力以觀後效○諭蔣霽遠奏回匪竄撲普安經官兵擊退一摺貴州普安廳於本年五月間被回匪竄擾經蔣霽遠派委知府胡林澍等帶兵往剿該匪擁眾猝至攻撲營盤官兵軍連日夾擊該匪傾巢而至並由劉官垕竄撲普安廳城總兵金剛保督率文武登陴守禦把總陳國泰立斃紅衣賊目一名兵練乘勢衝殺賊退城外之觀音山金剛保復令遊擊鄧逢霖乘夜襲營復暗出奇兵會合團練從後鈔擊賊眾驚潰由大坡鋪逃逸此次回匪攻撲普安廳城經兵練竭力守禦會同擊退辦理尙爲安速所有陣亡之弁兵練勇並著查明彙案請卹○諭軍機大臣等前因楚南賊匪圖竄川省諭令駱秉章如探明賊有入黔消息卽

調田興恕一軍由武岡至綏甯靖州一路力圖扼截本日據蔣爵
遠奏湖南之賊雖皆遁入廣西而由黔亦可入川急應豫籌防堵
況鎮遠思州等府廳苗教各匪又復蠢動請飭田興恕飛速回黔
助剿等語田興恕一軍甚爲得力該省見在賊勢猖獗著駱秉章
卽飭該副將帶同原隊兵練迅速赴黔仍由黎平一帶分道進剿
以免蔓延至黎平軍中缺餉已久省庫空虛無從籌解所有湖南
省欠解黔省各款餉銀並著駱秉章迅速籌撥以資接濟將此由
六百里諭令知之○諭勞崇光奏前借紳士銀兩請於續徵關稅
內撥還等語粵東前因軍餉緊要經黃宗漢飭令紳士伍崇曜代
借銀三十二萬兩應用見屆應還期限著照該督所請俟粵海關
稅續行徵有成數陸續給還以符原議前據桂良花沙納奏該大
臣等在上海時據黃仲畚稟稱葉名琛在總督任內有銀二百萬

兩交於伍崇曜收存嗣聞此項銀兩係存於志誠信銀號有葉名琛家丁二人知悉經桂良花沙納函致畢承昭屬其密查此信係由吳健彰交火輪船遞粵至今未有回信此時畢承昭如尙未離粵卽著勞崇光詢問該員接到桂良等信函何以未覆並另派委員密行查訪葉名琛究有存銀若干是否在志誠信銀號據實覆奏毋令伍崇曜等知悉致有欺隱將此由五百里諭令知之○丁亥曾國藩奏臣於八月十一日抵黃州與撫臣胡林翼晤商一切二十三日抵武昌晤督臣官文探聞湘賊大股全竄粵西前隊已趨義甯距黔省邊界甚近或由龍勝懷遠一帶入黔以遂其竄蜀之謀亦未可定惟以道里計之賊蹤離蜀尙隔三千餘里粵黔兩省萬山叢雜賊多食少勢難遽達蜀境查皖北粵捻各匪蔓延日廣南爲金陵蕪湖之援北爲齊豫數省之患自安慶至宿毫千餘

里人民迫切待救勝保翁同書兩軍相隔既遠東北各路亦無協
剿之師非由楚省派兵馳援不能牽制賊勢官文胡林翼擬將援
湘馬步各軍調回分路進發皖鄂接壤途徑紛歧上年李續賓銳
意深入連克四城因兵數太少有戰兵無守兵有正兵無援兵是
以中道挫衄今懲前此之失須合全力圖之中原腹地莫要於皖
就大局緩急而論臣自應回軍援皖先其所急九月初三日由武
昌回駐黃州下游之巴河詳考入皖形勢進兵須分四路南則循
江而下一由宿松石牌以規安慶一由太湖潛山以取桐城北則
循山而進一由英山霍山以取舒城一由商城六安以規廬州南
軍駐石牌則可與楊載福黃石磯之師聯爲一氣北軍至六安州
則可與翁同書壽州之師聯爲一氣臣所部不及萬人僅足自當
一路若將援湘之蓄啟江調回則臣處可分兩支若並將張運蘭

調回則處可分三支一支之力僅能會剿皖北三支之力則可

專任皖南此時湘事雖紆邊防尙緊臣擬酌留張運蘭一軍協剿

湖南咨調蕭啟江帶勇五千人來鄂相應請旨飭下湖南撫臣檄

催蕭啟江剋日前來會同鄂省各軍陸續東下以期廓清皖境

上諭軍機大臣等皖匪賊氛甚熾必須楚師東下方可掃蕩曾國

藩奏稱以兩軍循江而下規取安慶桐城兩軍循山而進規取舒

城廬州各軍所部兵勇自卽照官文前奏派撥該侍郎獨任一路

尙擬將蕭啟江調回派張運蘭留湘協防但蕭啟江一軍已入粵

西見當桂林危急萬分全恃此軍援應急切未能調回至湘中防

堵尙有兵勇可派著該侍郎斟酌情形卽將張運蘭調取回鄂亦

可補蕭啟江之缺再本日據袁甲三庚長奏見聞官文等籌議進

兵剿辦皖逆並議令勝保等於東北路截剿惟勝保傳振邦兵力

單弱一經楚師大舉深恐驅賊北竄請飭由光州固始潁州一帶繞赴北路進剿等語曾國藩所奏北路一軍由商城前進本去潁州不遠惟須折赴六安規取廬州則蒙亳等處已難兼顧此時捻粵勾結設因南路不支竟圖北竄恐傅振邦翁同書等不能堵遏袁甲三等所慮亦不爲無見著官文曾國藩胡林翼再行悉心籌酌所有東下四軍內應如何派出一軍取道光固潁州繞出懷蒙以北與勝保等官軍會合南剿俾逆匪不至北犯是爲至要至此次官文等會籌大舉開繫全局利害總須計出萬全不妨稍遲時日謀定後動也將此由六百里各諭令知之○戊子以煜綸爲盛京兵部侍郎

由左副都御史遷

○己丑

大考翰林詹事官擢顏宗儀等

二員一等餘升黜畱館有差○諭內閣傅振邦奏督剿北路竄匪迎擊疊勝將賊盡偪回巢一摺張家大屯唐家寨等處地方爲山

東江南河南三省交界股匪時思竄突經傅振邦分飭記名總兵
博崇武道員黃良楷等馬步各隊兵勇前後夾攻互相犄角馬隊
旋由張家大屯進至碭山縣境賊已聞風遠颺黃良楷等東勇先
已馳往北路堵截並經鄉團於黃河大隄修築濠牆該匪不能繞
越折而西竄直趨虞城夏邑交界東勇折回至夏邑之李家窪正
及賊之大股我軍分隊迎擊賊眾敗回復有大股蜂擁而前黑龍
江前鋒委驍騎校博克布奮勇當先直衝賊隊砍翻執旗賊目數
名佐領委營總恆齡同時衝入重圍縱橫馳突鏖戰自午至申三
時之久賊向西南奔竄我軍追殺十餘里全股北竄博崇武等馳
往遏截賊又北折而東我兵併力東追沿河截殺至薛家湖地方
賊復散漫由東而南我軍由王家樓一帶追至大同村適傅振邦
由灘口馳往接應各軍勇氣倍前賊隊驚亂紛紛南竄我軍追殺

過車家集賊眾窮蹙泗水歸巢是日由西折北又折東南追奔一百三十餘里斃賊三百餘名生擒二十一名奪獲賊馬四十餘匹槍礮器械無算仍著傳振邦督飭各軍直擣賊巢並確探各路分投堵截勿令再行竄擾○予安徽陣亡同知陳采倫等祭葬世職○辛卯諭軍機大臣等前因江蘇蕭縣民人鄭立本在步軍統領衙門呈訴賊勢鴟張懇令伊興額駐守濰溪降旨令勝保俟該副都統病痊後飭令仍往濰溪一帶督兵勦捕本日復據德楞額奏行次銅山有徐州士民楊介臣等呈稱伊興額見住徐城養病儘令就近辦理軍務必能滅賊奏功等語伊興額前此帶兵勦賊尙能得力見當徐宿等處賊勢蔓延旣據該士民等稱其威聲素著自宜俯順輿情著傳振邦就近查詢如該副都統病體漸痊卽飭隨同該提督進勦徐州一帶賊匪以收指臂之助將此由五百里

諭令知之○壬辰以捐輸軍餉永廣奉天蒙古學額各三名漢軍四名海城二名承德蓋平遼陽鐵嶺義州廣甯各一名甘肅皋蘭四名靖遠一名再永廣江西鄉試中額三名○癸巳諭內閣有鳳奏滇匪竄擾筠連等縣地方調派官兵勦辦一摺雲南大關鹽井渡匪徒聚眾數千由母豬巖等處分股竄擾四川筠連高縣慶符等處地方逼近筠邑經敘州府知府英匪親帶兵勇往堵該署督飛飭參將祥符永甯道陳枚帶兵募勇前往堵擊復商提臣萬福並飭臬司蔣徵蒲馳赴敘州相機駐紮調度先後調撥官兵三千名派參將高克謙順福等統帶前往總歸萬福調遣並咨滇省派兵合力夾擊布置尙屬周妥惟筠連等處雖俱係山徑小路而該匪分股竄入堵禦較難設有疏虞辦理更形棘手著有鳳萬福嚴飭帶兵各官迎頭截擊迅殲醜類毋令該匪闖入敘州府城將此

由五百里諭令知之○前任山東巡撫崇恩奏遵查煙臺海口試辦抽釐情形得旨該前撫所奏尙有不實不盡之處如該縣等平日不免抽收尙畏功令不敢形諸稟牘今既奉明文誠恐入官無幾徒飽私橐朕聞煙臺一處每船有七百金之多此項非爲通省漏規卽該處自然之利若不認真查辦尙復成何事體此時海防非喫緊之時著派郭嵩燾輕騎減從速往各處嚴密訪查仍會同文煜破除情面覈實具奏務期有裨經費杜侵漁而有限制方爲妥善並著僧格林沁於營中揀派妥員令郭嵩燾帶往查辦○甲午 上還宮○曹澍鍾奏逆首石達開竄粵後所結土匪心志不一屢遭挫衄不敢開仗惟築壘自固徧地密釘竹籤令人不能進出臣密飭將備步步爲營直逼賊壘分投挑戰並張貼簡明告示無論脅從及長髮老賊均許其來歸免死其薙髮逃出經兵練盤

獲者亦一律寬釋如能縛送首逆給予優賞旬日以來賊果疑懼多有投出者興安靈川之賊均向省竄擾經蕭啟江等督勇晉省分途圍殺九月初一日參將蕭榮芳等馳抵東城臣當就見到兵勇督飭出戰初四日蕭啟江派撥所部由南門文昌門分投進剿攻拔賊柵數座與蔣益澧等水陸兜截擒殺無數賊眾遁回西路死守連日諜報該逆石達開畏避義甯餘賊驚恐皆思逃竄臣正商督各軍次第合攻詎初十日該匪放火焚燒西南門所住民房全由南路潰遁傳聞石逆復自義甯折回擁眾混逃見在省城業已解圍惟石逆尙稽顙戮如向平樂南去四面可通出永福則可達柳州出永安則可達潯州若走賀縣恭城等處界連湖南廣東亟應實力跟追見飭蕭啟江蔣益澧各督兵勇探明賊蹤星夜躡剿蕭榮芳等軍仍飭由西路馳赴柳州剿匪以杜勾結省垣爲根

本重地擬由蘇鳳文等督率兵練嚴密梭巡防賊回竄仍遵旨飛咨廣東江西湖南各督撫臣飭令沿途文武各於交界要隘嚴行戒備確偵賊蹤迎頭截擊以期盡殲醜類此次打仗出力並防守省城之文武官紳俱屬著有微勞容臣擇尤保奏以昭激勸又奏石逆蹤迹詭密見雖窮蹙混逃而所在滋蔓必須接獲方可永除後患蕭啟江劉長佑各軍應仍畱粵合力跟追以殲羣醜且廣西盜賊如毛斷非蔣益澧一軍所能戡定蕭啟江謀勇兼長可否暫行畱粵會辦上諭內閣逆匪石達開自湖南擊敗後竄入廣西圍逼桂林省城蕭啟江等派撥所部分投進剿攻拔賊柵數座與蔣益澧等水陸兜擊擒斬無數城圍已解首逆石達開擁眾遁逃釜底遊魂難稽顯戮著曹澍鍾仍飭各軍分途追剿務將敗匪全數殲除以安疆圉○諭軍機大臣等此次逆匪未受大創石逆復

自義甯折回擁眾遁逃必須探明賊蹤奮力追剿廣東江西湖南三省均與粵西接壤爲該匪往來熟徑尤應實力截剿毋令竄入著勞崇光惲光宸略秉章飭令沿邊文武各於交界要隘嚴密防堵儻該匪竄至卽迎頭截擊不使入境並著曹澍鍾督飭各軍分路跟蹤將此股逆匪悉數殲除肅啟江一軍剿賊最爲得力著卽探賊所向迅速追擊儻石逆遁往他省亦著督兵出境窮追毋令免脫劉長佑見已補授廣西臬司該員所帶之兵並可酌量畱於該省以資剿辦將此由六百里諭令知之○免山西綏遠城官兵應扣整裝銀○丙申諭軍機大臣等有鳳奏滇匪竄擾川境筠連等縣相繼失守一摺此次雲南匪徒李短搭搭等由母豬巖攻撲筠連復有匪徒馬沅盛等會合紛竄以致筠連慶符高縣相繼失守雖事起倉卒而該地方文武毫無堵禦實堪痛恨見在提督萬

福督兵往剿並飭臬司蔣徵補馳往辦理前次調兵三千餘名並此次抽調各營兵一千五百名恐不敷堵剿亟宜添調精兵以期迅殄醜類所有防堵酉秀黔彭一路兵丁爲數不少見在桂林解圍賊已南竄該處防務稍鬆正可移緩就急將此項官兵酌分一半派得力將弁帶往敘州一帶協同剿辦務期剋期蕆事毋得遲延貽誤另片奏川省軍情緊要請飭祥奎暫緩赴粵等語祥奎著毋庸前赴廣西署理巡撫俟曹樹鍾回川經理喪事時當降旨另行派員署理至所稱勸諭山西陝西甘肅三省在川貿易商民捐輸軍餉准其援案辦理以供防堵之用並飭試用道楊觀曜幫同祥奎在省設局派員分投勸辦以資接濟所有筠連等縣文武下落並失守情形著詳細查明具奏毋許含混將此由六百里諭令知之○是月蠲緩廣西永甯等四十三州縣並歸德等十三土司

被擾村莊新舊額賦緩徵廣東德慶等七州縣被擾村莊新舊額賦